

և զերեքօրեայ յարութենէն. եկեր անդ 'ի վերնատան ըզ-
 զատիկն, հաստատեաց զխորհուրդ փրկական պատարա-
 գին, լուաց զոտս աշակերտացն, մատնեցաւ յաշակերտէն,
 կալեալ կապեցաւ 'ի զինուորաց յաղօթելն 'ի պարտիզին,
 և ածաւ 'ի տուն քահանայապետին Աննայի. եւ տեսեալ
 զնա յայն վիճակ դառնութեան՝ ուրախ եղեւ, և ետ կա-
 պել առ վայր մի 'ի ծառն ձիթենւոյ, (որոյ շառաւիղքն
 կան մինչեւ ցայսօր) եւ ապա առաքեաց առ փեսայ իւր
 Կայիափայ քահանայապետ մեծ ⁽¹⁾: Ապտակեցաւ 'ի ծա-
 ռայէն՝ չարչարեալ զգիշերն ողջոյն 'ի խոժանէն յայսմ
 կատականաց, երիցս ուրացաւ 'ի ծերունի աշակերտէն,
 և այլքն փախեան: Եկաց առաջի դատաւորին, յայտ ա-
 րար և ոչ թագոյց թէ արդարեւ Քրիստոսն է եւ թագա-
 ւոր: Յետ բազում դիմադարձութեան եւ խոստովանելոյ
 զանմեղութիւն նորա՝ ապա մատնեաց զնա դատաւորն
 'ի ձեռս՝ առ ահի ժողովրդեանն: Յետ բազմապատիկ դա-
 նից, նախատանաց և թշնամանաց բառնայր յինքեան ըզ-
 փայտ խաչին, ելանէր 'ի Գողգոթայ, մատուցանէր զինքն
 պատարագ բոլորանուէր մատուցանելով աղօթիս առ Հայր
 վստն հաշտութեան մարդկան ընդ Աստուծոյ, եւ սասա-
 նեալ չարժեցաւ բնութիւնն անմռունչ. ետուն դժոխք
 զաւար իւրեանց 'ի դուրս. վարագոյրն, որ զարբութիւն
 հնոց Կտակարանացն ծածկէր՝ ցեւաւ վերուստ 'ի վայր.
 բերան առն հեթանոսի օրհնեաց զԱստուած և խոստովան
 եղեւ թէ արդարեւ այրս այս արդար էր և Որդի Աստու-
 ծոյ. զերիս ժամս խաւար կալաւ զաշխարհ: Յովսէփ այր
 արդար և բարեգործ, իջոյց զմարմինն Յիսուսի 'ի խաչէն
 նիկողիմոսիւ, խնկեալ պատեաց զնա սուրբ կտաւովք,
 և թաղեաց մեծաւ փառաւորութեամբ 'ի նոր դերեզմանի:
 Իսկ Յիսուս աւերեալ զդժոխս և յաղթեալ բռնութեան
 մահու՝ յետ երից աւուրց յարուցեալ եւ 'ի գերեզմանէն,
 զոր կնքեալ էին մատանեաւ և պահէին զօրականաւ. ե-
 րեւեցաւ ամենօրհնեալ մօրն, կանանցն իւղաբերից և Աշա-
 կերտացն, Թովմայի, Կղէովպեանց, եւ այլոյ. եկաց ընդ
 նոսա աւուրս քառասուն արարեալ նշանս առաջի նոցա:

(1) Այժմ վանք Հայոց Ս. Փրկչի՝ ուր է և բանտ կենարարին մերոյ: